

AMÓS

Nukën 'Ibun Amós kuëan ñuikë bana

1 ¹ Ënë banax ka Amós kakë uni an ñuina bërúankë Tecoanu 'ikë uni a Diosan usokin ka Israel kama 'ati 'ikë kixun, rabé baritia anúan me shaikiti 'isama pain 'ain ká bana 'ikën, usa 'ain ka a barikaman Ozías ax Judá menu 'apu 'imainun Jeroboam Joásnën béchikë axribi Israel menu 'apu 'iakëxa.

² Uínsaran kara Nukën 'Ibu Dios ax Sión kakë aín bashi anuax banaia anun ka Jerusalénnuax kaná banakësaribi banai kiti 'ikën, kia kuakëbë ka an ñuina bërúankë unikaman anuxun aín ñuina pimikë pasto 'imainun ka Carmelo kakë aín bashi rëbunua 'ikë xëxá rëbukama axribi ëskiti 'ikën.

Dios Jerusalén rapasu 'ikë ëmakama 'atima okatsi kia bana

³ Ësai ka Dios kia:
“Damasconu 'ikë unikaman ka 'itsaira 'atima ñuira 'axa, usa 'ain kana atu 'aimama 'ikinma 'atima oti 'ain;

atun ka Galaadnu 'ikë 'ën unikama trigo bimi manë xon tákakin rishkikësa okinra tëmëramiakëxa.

⁴ Usa 'ain kana Hazael kakë 'apu kamabi aín aintsikama 'ia a 'imainun bërí 'ikë akamaribi 'aíma 'itánun tsin këñuti 'ain, usakin 'akëxun ka a tsinbi Ben-hadad kakë 'apu ain xububi xarokin këñuti 'ikën.

⁵ 'Anan kana atux kuëenkëbëtamabi Damasco ëma masókin ain xëpútikama xëputisama 'itánun chánkapatí 'ain; usokin 'anan kana Bicat-avén, 'ikëbi, Bet-edén kakinribi anëké anu 'ikë 'apu 'ati 'ain, usakin 'akëbëtan ka sirionu 'ikë unikaman Quirnu 'ikë unikama ñatanbiankin buankanti 'ikën.” Usai ka Dios kiaxa.

⁶ Ësai ka Dios kiaxa:
“Gazanu 'ikë unikaman ka 'itsaira 'atima ñuira axa, usa 'ain kana 'aimama 'ikinma atu tëmëramiti 'ain; atun ka achúshi ëmanu 'ikë uni kamabi ñatanbiankin buánxun, tëmëramikin ñu mëëmikë unisa 'ikë Edomnu 'ikë unikama maruakëxa.

- 7 Usa 'ain kana anun Gaza
 kakë ëma këñëara a pain
 tsin bimiti 'ain,
 'akëxun ka a tsinbi 'apun
 xubukama këñukin nénti
 'ikën.
- 8 Usokin 'anan kana Asdodnu
 'ikë unikama 'akin,
 Ascalón 'ikë aribi masókin
 'anan kana,
 ¡Ecrón nu 'ikëkama aribi
 masókin këñuti 'ain,
 këñukëx ka filisteo unikama
 ax achirabi bërútima
 bamati 'ikën!" Èsai ka
 Nukën 'Ibu kiaya.
- 9 Èsai ka Nukën 'Ibu kia:
 "Tironu 'ikë unikaman ka
 'itsaira ñu 'akin 'atima
 ñuira 'axa,
 usa 'ain kana 'aimama
 'ikinma atu tëmëramiti
 'ain;
 atun ka 'ain 'aintsisa 'aish
 abë nuibanankë 'ixunbi
 achúshi ñu 'á ami
 manukuainxun Edomnu
 'ikë unikama bëtsi uni
 'akësokín 'inankëxa.
- 10 Usa 'ain kana anun Tiro
 këñëara këñë a tsin
 bimiti 'ain, 'akëxun ka a
 tsiinbi 'apun xubukama a
 këñukín xaroti 'ikën."
- 11 Èsai ka Nukën 'Ibu kia:
 "Edomnu 'ikë unikaman ka
 'itsaira 'aisama ñu axa,
 usa 'ikë kana 'aimama
 'ikima atu tëmëramiti 'ain;
 atun ka nuibakinma aín
 manë xëtökë tuínxun aín

- xukën Israel unikama
 nuibianxun 'akëxa.
 Usakin 'ai ka kana nuibati
 'ai kixun sinanima atumi
 nishakëxa.
- 12 Usa 'ain kana Temán kakë
 ëma tsin bimiti 'ain,
 usakin 'akëxun a tsinbi
 Bosrá kakë ëmanu 'ikë
 'apun xubukama aribi
 mënukín xaroti 'ikën."
- 13 Èsai ka Nukën 'Ibu kia:
 Amónnu 'ikë unikaman ka
 'atima ñu 'akin 'itsaira
 'aisama ñuira 'axa,
 usa 'ain kana 'aimama
 'ikinma atu tëmëramiti
 'ain;
 atun ka Galaad menu 'ikë
 Israel unibunën xanu
 tuñukama atun me chaiira
 a bisatankin,
 panárabë okín tukapakëxa.
- 14 Usa 'ain kana anun Rabá
 kakë ëma këñëara këñë a
 tsin bimiti 'ain,
 bimikëxun ka a tsinbi 'apun
 xubukama nënkin xaroti
 'ikën,
 usakin 'akëx ka anun
 'akánanti nètë 'ianan, nètë
 masákuatsini kaná banakë
 usaribiti i amami amami
 unikama 'akánanti 'ikën.
- 15 'Imainun ka aín 'apu aín
 menua chikínbiankin bëtsi
 menu buánkin,
 aín 'apu 'imainun aín
 kushibu akëñunbi buánkë
 'iti 'ikën.
 Usai ka Nukën 'Ibu kia.

2 ¹ Ësai ka Nukën 'Ibu kia:
 Moabnu 'ikë unikama
 atúnribi ka 'itsaira ñu
 'aisama 'axa,
 usa 'ain kana 'aimama
 'ikinma atu têmëramiti
 'ain;
 atun ka Edomnu 'ikë
 'apun xokama 'aímai
 chimaputanun xarokëxa.

² Usa 'ain kana Moab kakë
 me a tsin néntanun 'amiti
 'ain,
 'amikëxun ka a tsinbi
 Queriotnu 'ikë 'apun
 xubukama xaroti 'ikën;
 usakin 'akëbë 'akanani
 sharákë a nëbétsinuxun,
 manë banañu banoia kuakë
 anunbi ka
 Moabnu 'ikë unikama këñuti
 'ikën.

³ ¡'Ën kana aín unikaman
 nëbétsi orakë 'ikëbi ain
 'apu 'ati 'ain;
 akëñun kana aín unikama
 ñu 'unanbu akamaribi 'ati
 'ain!
 Usai ka Nukën 'Ibu kiaxa:

⁴ Ësai ka Nukën 'Ibu kia:
 “Judánu 'ikë unikaman ka
 'itsaira ñu 'akin 'aisama
 ñuira 'axa,
 usa 'ikë kana 'atima oti
 ëntima 'ain,
 atun ka Diosan 'unánmisa
 tankë ñukama ënkin ax
 kikësaibi 'iti banakama a
 tanima 'iakëxa,
 usai 'ikin ka atun papan
 rabia

abi 'axuan unin a rabia
 ñukama rabikankëxa.
⁵ Usa 'ain kana Judá ëma tsin
 bimiti 'ain,
 bimikëxun ka a tsinbi
 Jerusalénnu 'ikë 'apun
 xubukama a nénkin xaroti
 'ikën.”

**Dios Israel unikama
 têmëramikatsi kia bana**

⁶ Ësai ka Nukën 'Ibu kia:
 “Israel unikaman ka 'aisama
 ñu 'akin 'atima ñuira 'axa,
 usa 'ain kana 'aimama
 'ikinma atu têmëramiti
 'ain;
 atun ka uni upí bëtsi ñu
 'akëmabi kuríki bianan
 bëtsi uni 'inánan,
 ñuñuma uni aribi ñu
 kupímara 'akësokin rabé
 taxaka kupín bëtsi uni
 maruia.

⁷ 'Anan ka ñuñuma unikamaribi
 'atima okin têmëramikin,
 atun ñu 'akëkama
 mënioxuntisama tania.
 'Ianan ka aín papan aín
 nami 'akë xanu aribi, aín
 bëchikënën aín nami 'aia,
 usakin 'akín ka 'ën bana upí
 'ikëbi 'aisama bërúmia.

⁸ Usakin 'anan ka kuríkiñuma
 'ikëa aín chupa ñuñuma
 uni bikuankë a 'apáxun
 atúnribi dioskama rabikin
 pianan añu kara 'akania
 anuribi atúxribi 'ikania;
 'anan ka ati kupíoti nankë a
 inumikian uni mëkamakin

- bikë kuríki anun uvas
baka maruxun anuxun
atun dios rabiti xubu
anuxun xëakania.
- ⁹ Usa 'aínbi kana 'ën
mitsúxmi anun unun,
amorreo unikama kamabi
këñukin 'akën;
atux ka kushiirabu 'aishi
kunxantibu atun chaxké
'ianan roble kakë i chaxké
témú 'iakëxa.
- ¹⁰ 'Aínbi kana Egipto menua
chikínbëtsinkin,
cuarenta baritia anu uni
'ikëma menu, 'imibëtsinkin
atun me 'inánuxun bëakën.
- ¹¹ Usa 'ain ka israel unikama
mitsunu an Dios kikë bana
ñuikë unikama 'ianan
Diosan aín uni 'iti kaiskë
unikama 'aíma 'iakëxa kix
kisama 'ikën. 'Ëx min 'Ibu
'aish kana aséjabi ësai kin.
- ¹² 'Aínbi kamina mitsun
uvas baka paëokin 'akë
a nazareo unikama abi
ubioxun xëamianan
an 'ën bana ñuikë unikama
'ën bana ñuixuma 'anun
kixun kakankën.
- ¹³ Usa 'ain kana 'anu ñu puruti
taë rabé okin 'akë anu
trigo purukë 'ain me
banamibiankë usaribi mitsun
xo shimú inumiti 'ain.
- ¹⁴ Usa 'ain ka axa abáti
'unainra axi abátima 'ikën;
'imainun ka uix kara kushi
'ikë ax kushiñumasa 'iti
'ikën,

- 'ianan ka axa 'akánanti
'unáinra axi iétima 'ikën.
- ¹⁵ 'Imainun ka axa pian 'akánanti
'unairakë axi aín pia ëbiani
abatibi ëñëtima 'ikën,
'ianan ka axa taën abáti
'unáinra suntáru axi
abátima 'ikën,
'imainun ka axa caballonën
niti 'unáinra axbi abatibi
iétima 'ikën.
- ¹⁶ A nëtën ka axa 'akánanti
'unáinra uni axbi abáti 'ikën,
'imainun ka suntáru
'akánanti 'unainrakama
axi atun chupa pëbiani
chupañuma abáti 'ikën,"
Usai ka Dios kia.

**Diosan Israel unikama atun
'ucha kupín 'atima oti bana**

3 ¹ Israel unikama mikaman
kamina ësai ka Dios kia kuati
'ain, an ka aín uni 'ikë Egipto
menua chikíankëxa:

- ² “'Ën kana kamabi menu 'ikë
unikama
'akima mitsuishi kaisakën.
Usa 'ikë kana uisa ñu
'atimakama kaina 'akan
usakinbi a kupín mitsu
tëmëramiti 'ain.”
- ³ Achúshi achúshi ñu 'ikë
ax ka an 'imiti anu aia
'ikë 'ikën, ¿Rabé uníxa
ënananima nikë ax kara
usakin kananuna ñu 'ati
'ai kix kanamaxa 'ikë 'ik?
Usama kat;
- ⁴ paru 'inuánëxa ninuax
kuëërukë ax kara aín piti

- ñuina biaxa 'ikë 'iti 'ikën.
 Usa kat;
 paru 'inuán tuá axa
 kininuax kurukikë ax kara
 aín piti ñuina biaxa 'ikë ik
 usa kat;
⁵ ¿achúshi 'isá menu pakëkë
 ax kara ami 'iti ñu nankë
 'aia ami 'ikë 'ik? Usa kat;
 ¿anu ñu 'iti nankë axa
 menuax tarishkikë ax kara
 amia ñu 'ikëxa 'ikë 'ik?
 Usa kat;
⁶ ¿manë banañu emanuxun
 banókë ax kara, anua
 unikama mënfohati 'akë
 'ik? Usa kat;
 ¿ñu 'aisama emanu inúkë
 ax ka Dios usai 'iti
 kuënkëbëa 'ikë 'iti 'ik?
 Usa kat.
⁷ Usa 'ain ka uinsaranbi
 Nukën 'Ibun
 aín bana ñuikë unikama a
 usakin kana ñu 'ai kixun
 'unánmixuma ñu 'aima.
⁸ Uínsaran kara paru 'inúan
 kuëruia anun kara ¿uix
 rakuéti bërëima 'iti 'ik?
 Ka rakuéti 'ikën.
 ¿Uin kara Dios kamabi
 kushiñu axa kuërukësa
 'inun banakëbëtan tënëti
 'ik? Uínbi ka 'atima 'ikën.

**Dios Samaria ëma ka
 'aisama okin këñúkë 'iti
 'ikë kia ñuikë bana**

- ⁹ An bana ñuikë
 mitsun kamina anu
 kuantankëxun,

Asdodnu 'ikë unikama
 'imainun:
 Egiptonu 'ikë unikama
 mikaman kamina;
 “Samarianu 'ikë unikama
 kara Diosan uisa oia isi
 unun kati 'ain anuxun ka
 suntárukama aín bashi
 manan
 bukuxun aín aintsibi
 tëmëramianan 'atima okë
 a isi uti 'ikën.”

- ¹⁰ Èsai ka Dios kia:
 “Atun ka upíokin ñu 'ati
 'unanima;
 usa 'ixun ka 'apun
 xubukamanu bënëkinshia
 mëkamakin bikë ñukama
 bukunruaxa.”

- ¹¹ Usa 'ain ka ësai Nukën 'Ibu
 Dios kia:
 “Axa ami nishkë Samaria
 emanu 'ikë suntárukama
 me tsitsiru bëtsini amami
 amami ax ukin ka
 anun ëma bëararakë a
 rurupabiani atsínxun
 'apun xubukamanu 'ikë
 ñukama biti 'ikën.”

- ¹² Èsai ka Nukën 'Ibu kia:
 “An ñuina bërúankë unían
 paru 'inúanën pikëbi aín,
 taë rabé bianan aín pabí
 rëbura bikë usaribiti
 ka Israel unikama axa
 Samaria menu tsókë
 akamax 'itsamashi abáti
 'ikën,
 'ianan ka an xubu
 upírakama anu tsóti
 'anan,

ami tēpi rakati Damasconu
'ikē xubukama anu 'akē
atúxribi abáti 'ikēn.”

¹³ Nukēn 'Ibu Dios kamabi
kushiñuira ax ka ësai kia:

“Mitsun kuakin kamina
uisai kara Jacobnēn
rēbúnkikama 'iakēxa
kixun a ñuiti 'ain,

¹⁴ uisa nētēn karana 'ēn Israel
unikama atun 'ucha kupín
tēmērami anun kana,
anuxua atun dios rabikin
ñuina xarokē Betelnu; 'ikē
a 'aisama onan masókin;
ain mancha akamaribi
tukapakēxa menu
rēukubutanun 'imiti 'ain.
(Manchan kikē ax ka aín
kushi ki kikē 'ikēn.)

¹⁵ 'Anan kana anuxun mita
inúmiti 'anan, anu
baritia inúmi tantiti
xubukamaribi 'ati 'ain,
'anan kana xubukama ñuina
xētakēñun mēskukin,
kuríkiñu unikaman 'amikē
akamaribi 'imainun 'apu
chairabu akamaribi
kēñuti 'ain.”

Kiax ka Dios kiaxa. (Xubu
kuríki.)

4 ¹ Samarianu 'ikē xanukama
ēsokin mitsu kamainun
kamina kuati 'ain:
Mitsux kamina Basán menu
'ikē vaca ain xanu xuabu
usaribi 'aish xubairabu
'ain,
usa 'ixun kamina uni
ñuñuma 'atima onan,

an ñu kuēenkin bisatankē a
'ianan,
mitsun bēnēkamaribi a xēati
uvas baka paëokin 'akē
bēxunun kixun kain.

² 'Aínbi ka Dios upíira
kamabi kushiñu ax ësai
sinanatēkēntima oi
kiakēxa:

“Anun 'ēn mitsu kuēkinan
bikēsa obiankin uanan,
mitsun bakē
bēchikēkamaribi
mishkitinēn bēmēti nētē
ka 'iti 'ikēn.

³ Usakin 'akēx kuani ka anun
kēnēara kēnē pēánkakē
anun chikiti sēnēnbi
puntēkiani kuani ka
ain bashi Hermón kakē anu
niti 'ikēn.”

Usai ka Dios kiaxa.

**Diosan 'atima okēxunbi
Israel unikaman
'unántisama tan ñuikē bana**

⁴ “Mitsux kamina Betelnu
kuanan Guilganuribi
kuankan 'ain,
januax 'uchakani kamina
mitsux bana kuatima
'ikēsairai 'ikanti 'ain!

Usai 'ikín kamina ami
pēkarakēma 'aínshi xaroti,
'imainun mapai rabé 'ikēbi
achúshi bikē aribi rabé
'imainun achúshi nētē
'ikēbē 'ikēbētan 'aíbi
kamina 'uchakanin.

⁵ Mitsun kamina anun chamiti
ñukēñunma 'akē pankama

akamina asábika kakin
 xaroxunkanin usakin 'aibi
 kamina 'uchakanin,
 'imainun kamina kamabi
 unin 'unántanun a 'ináishiti
 bikë akama chaniokanin,
 usokin ñu 'ati kamina
 mitsun kuëenkanin.
 Usai ka Nukën 'Ibu asérabi
 kiaxa.

**'Atima ñu 'ai tëmëraibi ka
 Israel kama sinanatima
 kixun ñuikë bana**

- 6 'Ën kana mitsun
 ëmakanuaxmi panani
 tsónun mitsu 'imiakën;
 'imianan kana kamabi uníxa
 pitiñuma 'inun 'imiakën,
 jusa 'aínbi kamina mitsux
 'ëmi sinanatëkéinsama
 tankën!"
 Usai ka Dios kiaxa.
- 7 'Imainun kana mitsun ñu
 'apákë
 pëkémissa tankëbëtanbi 'uí
 'ibúnun 'imiama 'ain.
 "Imianan kana bëtsi ëmanu
 'uí 'ibúmiyanan bëtsinu uí
 'ibúnun 'imiama 'ain;
 usokin 'akëbë ka anua
 'uñe 'ibúkë ni ax chabá
 'imainun anua 'ibúkëma
 ni ax 'umpax 'aíma 'ain
 me éskiakëxa;
- 8 usai 'ikëbë ka unikama
 ëmaitsi ëmaitsinu 'umpax
 bari kuankëxa;
 usai nikinbi ka 'umpax
 cha shimaxun xëatisabi
 mërakama 'ikën,

jusa 'aínbi kamina mitsux
 'ëmi sinanatëkéinsama
 tankänkën!"

Usai ka Dios kiaxa.

- 9 "Usa 'ain kana amiaxa
 bari urukë amiax suñu
 kushiira ukian, mitsun ñu
 'apákëkama masómainun,
 ñu 'atimakama aribi 'anun
 'amiakën,
 'amianan kana mitsun
 'apákë ñukama 'imainun
 uvas 'apákë akama
 chushitanun 'imiakën,
 usai 'imainun ka champun
 mitsun higuera 'imainun
 olivos akama ain pëi
 pinun 'amiakën,
 j'áinbi kamina mitsux
 'ëmi sinanatëkéinsama
 tankänkën!"

Usai ka Dios kiaxa.

- 10 "Usa 'ain kana ñu 'atima
 Egipto menu 'imiasaribi
 okin atunu 'imiakën;
 uni bënábukama anuax
 'akanankë me anuax
 bamanun 'imiakën,
 usakin 'anan kana atun
 caballokama axa ami
 nishkë unikama atunan
 'inun 'ibuanun 'amiakën,
 'amianan kana anua atux
 'ikë anuaxa ñukë unin
 'isha xënun xëmiakën,
 jusa 'aínbi kamina mitsux
 'ëmi sinántëkëntisama
 tankänkën!"

Usai ka Dios kiaxa.

- 11 "Anan kana atu 'atimaira
 okin achúshi ñun

Sodoma 'imainun Gomorra
 'asaribiokin 'akën;
 ax ka tsi ënxaira anua aín
 ëxku ënxaira bikësa
 'iakëxa,
 jusa 'aínbi kamina mitsux
 'ëmi sinanatëkëinsama
 tankankën!"

Usai ka Dios kiaxa.

- ¹² "Usa 'ain kana Israel
 unikama mitsu usaribi
 okin 'ati 'ain;
 'ën kana 'ai usa 'ain,
 jusa 'ain kamina mitsux
 Diosbë mërananux
 mëníokakanti 'ain!"
- ¹³ Nukën 'Ibu Dios an
 bashikama unionan suñu
 bëkinun 'imikë,
 'imainun uisa ñukama
 kara 'akatsia akama uni
 'unánmikë, 'ianan
 an béanbëankikë anubi
 nëtë xabá 'imianan,
 kamabi menu 'ikë bashi
 manankama a manami
 anubi 'ikë ax ka kamabi
 kushiñuira Dios a 'ikën, ax
 ka ain anë 'ikën.

**Israel unikama ka
 amiribishi Dios mi
 sinanatëkënti 'ikë kia bana**

5 ¹ Israelkaman ka 'ën bana
 kuati 'ikën;
 'ëx kana usámi mitsux ñu
 inuti masá nuituti a ñuí
 kin.

² Israel unikama asérabi
 upíira, upí ax ka xu xanu
 unibë 'ikín tankëma axa

bënuax kuëeni tsókëma
 a 'unánkëma 'aíshbi 'akë
 usairibi 'iaxa;
 usai 'ika únsaranbi
 nirutëkëntima oi
 pakëakëxa.

Usai 'ika aín menubi
 rakabuti ñukankëxa,
 usa 'aínbi ka an birutëkënti
 'aíma 'ikën.

- ³ Èsokin ka Diosan Israel
 unikama kaia:
 "Achúshi ëmanuxun mil uni
 'akanania kuantanun xukë
 ax ka upí 'itima 'ikën,
 'aínbi ka cien uníxëshi
 uisaibi 'ikëma asábi
 utëkënti 'ikën;
 'imainun ka bëtsi
 ëmanuxunribi cien uni
 'akanania kuantanun
 xuti 'ikën, 'aínbi ka diez
 uníxëshi uisaibi 'ikëma
 asábi utëkënti 'ikën."

⁴ Èsakin ka aín 'Ibu Diosan
 Israel unikama kaia:
 "Abi xëñibuax tsótisa tani,
 kamina 'ëmi sinánkanti
 'ain.

- ⁵ Betel kakë anu kuanxma
 'ianan kamina,
 Guilgal kakë anu 'ikë
 anuribi kuankantima 'ain
 usai 'i kamina Beerseba anu
 'ikë anunribi inútima 'ain,
 Guilgalnu 'ikë unikama ka
 ñatanbiankin uankë 'iti
 'ikën,
 'imainun ka Betel ax
 uníñuma ñankáishi bërúti
 'ikën."

- 6 Israel unikama mitsux
kamina Diosmi
sinanatëkënti 'ain,
usai ami sinánkëbëtama ka
Israel unikaman ëma axa
ami nishkë unikaman tsin
mënuti 'ikën.
Usakin akëbë ka an tsi
rëkirukë a Betelnua
bënánti 'aíma 'iti 'ikën.
- 7 ¡Mitsun kamina bëtsin
'atima okë unikama
upíokin 'akinkëma 'ain
'ianan kamina 'akinsa 'ikëbi
'akinkëma 'ain!
- 8-9 Diosan ka naínu 'ikë
'ispakama 'imainun,
'ispónkama 'akëxa,
an ka imé nëtë 'inun
'imianan,
nëtë aribi imé 'inun 'imia
këxa;
an ka parúmpapa 'umpax
timëtankëxun
chabóia menu 'ibúnun 'imia;
uin kara anun ëma kënëara
a rurupatia.
Ax ka kamabi kushiñu Dios
a 'ikën.
- 10 ¡Mitsun kamina an aséرابي
ñu 'akë 'imainun,
axa aséرابي banakë unikama
a kuëenkaniman!
- 11 Mitsun kamina kuríkiñu
'ixun ñuñuma unikama a
'atima okin
atun trigo kupísa mitsu
kupíonun kixun 'amin,
usa 'ain kamina mitsun
xubu maxá upíokin 'akë
anubi 'ima 'ianan,

- mitsun 'apákë uvas baka abi
xëakantima 'ain.
- 12 'Ën kana bëtsi bëtsi ñu 'aia
'itsaira nëtëtisamaira
'inun atux 'uchakëkama a
'unan:
Usa 'ixun ka uni upíbu
a 'atima okin anuxun
bana mëníokë anuxun
'apukaman kuríki bitsia
uni 'atimakama anun
rabanan nékin, ka uni
upíkama 'atima oia,
usa 'ain ka ñuñu unikaman
bana mëníokin uni
ñuñuma a ñuumasara 'ikë
kanania.
- 13 Usa 'ain ka uix kara
sinánñuira 'ikë ax
banaima nëtëkë 'iti 'ikën,
ënë nëtë ka 'aisama 'ikë usa
'ain.
- 14 Usa 'ain ka uisa ñux kara
upí 'ikë ashi 'anan uisa
ñux kara 'atima 'ikë a ënë
upíti tsókanti 'ikën;
usai 'ikëbë ka mitsúxmi kikë
bana ax aséرابي 'iti 'ikën:
usa 'ain ka Dios, kamabi
kushiñu ax mitsubë 'ikën.
- 15 ¡'Atima ñu a timakin
kamina! ¡Upí ñuishi 'ati
'ain!
anuxun bana mëníoti
anuxun kamabi upíokin
'akinkëbë;
sapi ka Dios, kamabi
kushiñu ax mitsubë 'iti
'ikën,
usai 'ikin ka axa raíri
këñumainun tsókëpan

- Israel unikama a nuibati
'ikën.
- 16 Ēsai ka Dios kamabi
kushiñuira ax kia:
“Kamabi ëmanu anu bukuti
mëníokë anuax bëunan
mëskuti 'imainun ka
anun ëmanu niti
baikamanuax kuënkëni
paëtani 'iti 'ikën.
'Imainun ka axa naënu tëëkë
unikama atux anuaxbi
inkanti 'ikën,
inkëbë ka inkëntapunkama
axribi anua inkë anuaxbi
inti 'ikën.
- 17 Kamabi uvas 'apákë
naëkamanuax ka
'ën atu tëmëramiti ukëbë
inkanti 'ikën.”
Usai ka Dios kiaxa.
- 18 ¡An Diosan nëtë 'iti 'itsaira
kainkë unikama!
¿Uisa kara a nëtë mitsunan
'iti 'ikë kixun kaina
'unánkanin?
A nëtëx ka ami rakuékë
'ianan bëánkibukë 'iti
'ikën, kara xabá 'itima
'ikën.
- 19 'Ianan kara achúshi uníxa
paru 'inúanën nuikëx
abatibi
xaëón manan 'irukë usaribi,
'ianan ka achúshi uni
abákuatsini uax tanti ñu
sinanimaishi aín xubunu
atsíntankëx,
këpiti tsóbutiabi achúshi
runun 'akë usaribiti abáti
katamëtima 'ikën.
- 20 Asérami ka anun 'ëx uti
nëtë ax bëan bëánkibukë
'ianan xabá 'itima 'ikën;
usa 'aish ka a nëtë anun
kuëënima 'itsaira masá
nuituti nëtë 'iti 'ikën.
- 21 'Ën kana mitsunmi timéxun
fiesta 'akë a asérami
kuëëniman;
'imainun kana ñu rabi
timëkankë abi istisama
tankin timain.
- 22 'Ën kana mitsunmi ñuina
'aímai xarátanun 'ë
xaroxunkë abi kuëëniman,
'imainun kana 'ë 'inaínshiti
bikë ñu bimikama abi
istisama tanin;
'ianan kana vaca bakë
xuairabu anúnmi mitsux
'uchakë mëníokakanti
'ë 'axunti mi bëkankë
akamabi istisama tanin.
- 23 ¡'Ën kana kantai sháarakankë
abi kuaisamatankin
timain!
¡'Ianan kana mitsun arpa
banamikin mëkë abi
kuëëniman!
- 24 'Aínbi ka bëtsi uni 'atima
oima upiti tsóanan
nuibanankë ax kuni
'umpax shióbukë usaribi
'iti 'ikën,
'imainun ka nuibanankë
ax kuni 'umpax upíira
këñúkëma usaribi 'iti
'ikën.
- 25 “Israel unikama, ¿mitsun
chaitiokékaman kara
cuarenta baritia anu uni

- 'ikëma menu nikin ñuina
xaroxuanan, 'ë 'inánti
bikë ñu a 'ë 'inankankëx?
²⁶ Bëri kamina mitsun 'apu
Sicut kakë tankin 'akë
'ianan aín 'ispa Quiiún
kakë a 'ë 'axunkima ñuina
xaroxunkanin, usa 'ain
kamina mitsun dioskama
tankinmi akan a 'iax abëbi
kuankanti 'ain.
²⁷ Usa 'ain kana ñatanbiankin
mitsu axa mimi nishkë
unikaman Damasco ëma
inumibiankin buántanun
'amiti 'ain. Usai ka Dios
kamabi kushiñuira ax kia.
Usa ka aín anë 'ikën.

**Israel unikama Diosan
tëmëramia ñuikë bana**

- 6** ¹ ¡Axa Jerusalén 'ikëbi Sión
kakë anu tëmëraima
bukukë unikama!
¡'ianan Samaria ëmanu uisaibi
kananuna 'ima kixun sinani
bukukë 'apukama,
amia Israel unikama
katamëkë atux ka kuanti
'ikën!
² Calné kakë ëma anu
kuanxun kamina isti 'ain;
anuax kamina Hamat kakë
'imainun,
filisteo unikama anu
'ikë Gat kakë ëma anu
kuabuxun uisa ñu kara
anu 'ia isikuanti 'ain.
¿Mitsux kaina a
ëmakamasamaira upíira
'ikanin?

- ¿Mitsun ëma ax kara atun
ëmasamaira 'ik?
³ Mitsun kamina upiti
bukukinbi uisa ñu kara
inuti 'ikë a 'unánkaniman,
usa 'ain ka a sinanimami
bukukë a ñunbi mitsu
'atima oti 'ikën.
⁴ Mitsun kamina anu uxti
ñu xëta 'akë upíira anu
rakáxun nëtë inúmin,
usai 'ikin kamina oveja tuá
bëri kanikëkama a 'imainun
vaca bëri kanikëkama
xuairabu a 'axun pikanin;
⁵ usai 'ikin kamina;
Davidtan 'asaribiokin flauta
'akatsi kixun, uisakin
mëëti kara 'unánkimabi
'akatsi kixun tankanin;
⁶ 'anan kamina uvas baka
'akë ami xëati chaiira ami
xëakanin,
'ianan kamina sanuira
rokama anúnribi 'ikanin,
¡usai 'ikin kamina uisai kara
ënë ëma 'iti 'ikë kixun abi
sinánkaniman!
⁷ Usa 'ain kamina mitsux
irapain ñatanbiankin
buánkë 'inuxun 'ain,
usakin 'akëbë ka mitsumi
tsuákiruxun piti 'akë ax
nëtëti 'ikën.
⁸ Usa 'ain ka Dios ax asérami
sinanatëkëntima oi ësai
kiaxa;
Dios kamabi kushiñu ax ka
usai kia:
'Ën kana Jacobnën
rëbúnikamaxa rabiakakë

- a kuëeniman usa 'ain kana
'apun xubukamanua 'ikë
ñu upíbu;
a axa ami nishkë unikaman
atun ëmanua buántanun
'amiti 'ain.”
- ⁹ Usa 'ain ka mapai rabé uni
achúshi xubunu bërúti
akamaxbi bamakë 'iti
'ikën.
- ¹⁰ Usa 'ain ka unin aín aintsi
xubu 'ukëmëu bamakë
biruti ax rakué chaiira
'iti 'ikën, usa 'ain ka aín
aintsi an bëtsi ñukáti
'ikën: ñukákëxun ka
bëtsin 'ukëmëu kamina
kuanti 'ai kixun kati 'ikën.
“¿Anu kara bëtsi uniribi
mibë 'aíma 'ik?” Aíma
ka kixun ka bëtsi kati
'ikën. Kakëxun ka ax pain
atsínkë an bëtsi kati 'ikën:
“¿Ka nëtët, Diosan anë
ñuimina 'atimati banai
kixun!”
- ¹¹ Usa 'ain ka Diosax xubu
cha akama 'imainun xubu
chukúmakama ax ka
'atimokëx kamáxbi 'aíma
'iti 'ikë kixun kiti 'ikën.
- ¹² ¿Caballokamax kara xaxun
pobu anun abáti 'ik? Ka
'itima 'ikën.
¿Parúmpapax kara me
'akësaribi okin tukapakin
buinaisa 'ik? Ka 'aisama
'ikën,
'aínbi kamina mitsun
upíokin ñu 'ati 'ikëbi
muka ro 'akësokin 'akan

¿usakin 'akin kamina upíokin
asérabi bëtsi 'atima onux
këmëi banatima 'ain!

- ¹³ Mitsux kamina këmëishi
kikanin:
“Nun kushínbi kananuna
achúshi ëma biti 'ain
bianan kananuna ëma
kushiirakama abi 'ati 'ai
kiax kikanin.”
- ¹⁴ Israel unikama mitsun
kamina upíokin kuati 'ain;
Nukën 'Ibu Dios kamabi
kushiñu ax ka ësai kia:
“Ën kana achúshi ëmanu
'ikë unikama an mitsu,
asérabi tëmëramikin
atsanmiti xuti 'ain,
xukëx aín tsipúmiak ukin ka
aín rëbumi okin tëokima
mitsu atun 'ati 'ikën.”

**Amósnën champun ñu 'atimoti
namákësa okin isa ñuikë bana**

7 ¹Ënë ñu ka Diosan 'ë ismiaxa:
Ñu 'apákëkama bimikë 'apu
bixunkë 'aia, bërí 'apákëkama
ax biminux kókëbëtan ka Diosan
'aisamaira champu 'ë namákëso-
kin ismiaxa. ²Usakin 'imikëxun
'aisamaira champun tëokimaira
ñu pikëbëtan kana 'ën kan:

—¿Nukën 'Ibu Dios nukamina
uisabi okima nuibati 'ain! ¿Nux
karanuna Jacobnën rëbúnki 'aish
'itsama uni ëmanu bërúkë 'ain?

³Ësokin kakëxun kuati ka Dios
nu nuibati numi sinani kiaxa:

—¿Asabi ka usa 'ain kana ënë
champukama mitsu 'aisama onun
xutima 'ain!

**Amósnën namákësokin tsin
ñu këñuti isa ñuikë bana**

⁴Ënë ñu ka namákësokin Diosan 'ë ismiäxa: Ismikëxun kana anun 'atima okin nu tëmëramiti tsi ënxaira an parúpapa nëmin abi éskakin xaronan kamabi naëkama këñuti xutia isan. ⁵Iskin kana 'ën kan:

—jUsokin kamina nu 'atima 'ain! ¿Uisaxun kara Jacobnën rëbúnkikaman ax ëma chukúmara 'ixun usakin min 'akëxun tënëti 'ik?

⁶Ësokin kakëx ka Nukën 'Ibu nu nuibati ësai kiäxa:

—jAsabi ka usa 'ain kana usaira okin mitsu 'atima 'ain!

**Namákësokin anun xubu
tupúnti manë tumua
'akë isa ñuikë bana**

⁷Nukën 'Ibu Diosan ka ësari-biokin 'ë namákësa okin ismiäxa: Usa 'ain ka anun ëma këñëarakë rapasu, an xubu 'ati 'unánkë unían anun xubu tupunkë manë tumua a tuiänx nikë 'iäxa. ⁸Anuxun ka 'ë ñukáxa:

—¿Añu kaina isin Amós?

An xubu 'ati 'unánkë unían tuinkë manë tumua achúshi kana isin, —kixun kana 'ën kakën.

Kakëxun ka an ësokin 'ë kakëxa:

—Manë tumua an xubu 'ati 'unán unin tuinkë 'ën tuinkë ënën kana, 'ën uisai kara 'ën uni Israelkama 'uchaxa kara 'uchakëma 'ikë kixun tanti 'ain. Usokin tantankëxun kana, kana nuibati

'ai kixun sinántëkënkima 'atimoti 'ain. ⁹Usokin 'anan kana anuxun Israelnën rëbúnkikaman ñu tankin 'axun rabiakama masókin ruru-panan, anuxua Israel unikama ñu tankin unioxun rabia xubukama axribi ka rurupakë 'iti 'ikën: jUsakin 'anan kana axa ami nishkë unikama Jeroboamnën aintsikama manë xëtokën anun 'amiti 'ain!

**Amasías Amósbë
nishanan ñuikë bana**

¹⁰Amasías sacerdote Betelnu 'ikë an ka Jeroboam Israel unikaman 'apu ësokin katánun uni xuakëxa: “Amós an ka Israel unikama mix 'apu 'ain 'atimai mimi banakin atu ësëia. Usa 'ain kananuna Israel unikama nun usaía bananun ëntima 'ain. ¹¹Ax ka ësai ki nitsia: Jeroboam ax ka manë xëtokën 'akëx bamati 'ikën, 'imainun ka kamabi Israel unikamaxribi ñatanbiankin atun menu buánkë 'iti 'ikën.”

¹²Usai kitankëxun ka Amasíasnën aminishkin Amós kakëxa:

—jËnuax kamina bërí kuantí 'ain an bana ñuikë uni mix! An Dios kikë bana ñuikë uni 'ixun tëxunmabi ñu bianan upiti tsókin písa tani kamina Judá menu kuantí 'ain; ¹³'aínbi kamina Betelnuxun bana ñuixuntëkëntima 'ain, a ëmanu ka anuxua 'apun aín dios rabikë xubu ax 'ikën, usa 'ain ka anu 'apu aín dios rabi kuania.

¹⁴Aínbi ka Amósnën kakëxa:

—'Ëx kana an Dios kikë bana ñuikë uni 'ama 'ain, 'ianan kana

a kana 'iti 'ai kixunbi sinaniman: Usa 'aish kana bëtsi unin 'arakakë ñuina bëruanxuni nikin 'apákëma higo bimikama bitsi nikë uni 'ëx 'ain, ¹⁵'aínbi ka Diosan ñuina bëruái nikë 'ikëbi a ëmikin ësokin 'ë kaxa: 'Anu kuanxun kamina Israel unikama 'ëx kikë bana-kama ñuixuni kuantu 'ain. ¹⁶Usa 'ain kamina, ësai ka Dios kixaxa aín bana kuati 'ain. Diosan bana ñuikin kamina Israel unikama katima 'ain, 'ianan kamina Isaacnën rëbúnkikamaribi ñui uisa bananbi banatima 'ain. ¹⁷'Aínbi ka ësai Dios kixaxa: Kamina kuati 'ain min xanu ka ëma xabánubi rakanxun unin aín nami 'ati 'ikën, min bakë bëchikë bëbu 'imainun xanukamaxribi manë xëtökën 'akëx bamati 'ikën; 'imainun ka min mekamaribi bëtsibë bëtsibë 'inánankë 'iti 'ikën; 'imainun kamina mixribi an Dios rabikëma unikaman menuax bamakë 'iti 'ain, 'imainun ka Israel unikamaribi ñatanbiankin aín me 'ura uankë 'iti 'ikën.

**Amósnën namákësokín
ñu bimi pëkéké tasánu
purukë isa ñuikë bana**

8 ¹Ënë ka Diosan namákësokín 'ë ismiakëxa: Anu ka tasá achúshi anu ñu bimi pëkéké purukë 'iakëxa, ²usa 'ain ka an 'ë ñukákëxa:

—¿Amós añu kaina isin?

—Achúshi tasánu ñu bimi pëkéké purukë —kana isi kixun kana 'ën kakën.

Kakëxun ka Diosan ësokín 'ë kakëxa:

—Israel unikamax ka ñu bimi pëkéké usaribi 'ikën usa 'ain ka anun 'ën 'atimoti nëtë 'iaxa. ³Usa 'ain ka a nëtë 'ikëbë 'apun xubunuaxa kantakë a nëtëti 'itsaira uni bamakë ain inkë 'iti 'ikën. Usa 'ain ka 'itsaira uni bamakëbë bana nëtëkëbëtan bamakë unikama an maínti aíma 'ain ëman pukë 'iti 'ikën. Usai ka Dios kixaxa.

**Anun Israel unikama
'atimoti nëtë ka
'uramatia kikë bana**

⁴An ñu kuëenkin bisatankë 'imainun uni ñuñumakama an me masókë mitsun kamina ënë bana kuati 'ain; ⁵Mitsux kamina ësai kikanin: “¿Uínsaran kara nun trigo marunun 'uxë ió 'ikëbëtan fiesta 'ati nëtë ax inuti 'ik? ¿Uínsaran kara anun ñu mëëtima nëtë sábadu ax anun nun trigo bimi kupíra marukinbi anun tupúnti anun tupunkinbi mëkamanun a nëtë inuti 'ik? ⁶¿Usa 'ain kananuna ñuñuma unikama an nu ribinkë kupíoi nunubi ténun 'imiti 'ain, usokín 'akëxun ka rabé taxakara kupínbi nu ñu mëëxunti 'ikën! ¿Usai 'ia kananuna trigo 'aisama abi atu maruti 'ain!” ⁷Ëx kana Israel unikaman Dios 'ain: “usa 'ixun kana atun 'atima ñu 'akëkama uínsaranbi manutima 'ain.”

⁸ ¿Ënë ñukama kupín kara me shaíkítima 'ik?

¿Kamabi aín unikamax kara intima 'ik?

- ¡Mex ka kuarutankëxbi
 ubutëkënti 'ikën,
 Nilo kakë baka 'ëi
 chaakin maputankëxbi
 kuabútëkënkë usaribiti!
- ⁹ “A nëtëán 'iti ñui ka Dios
 ësai kiaxa,
 'ën kana maníti xamánruibia
 béankinun bari 'imiti 'ain,
 'imianan kana nëtë xabá
 'ikëbia béankikin me
 mapunun 'imiti 'ain.
- ¹⁰ Usokin 'anan kana fiesta
 'aia kuënkankë aribi
 uni bamakë 'ain nitëxëkë
 usaribi 'inun 'imiti 'ain,
 'imainun ka atúxa kantakë
 axribi maínnuxun bamaia
 uni bënini rarumakë
 usaribi 'iti 'ikën;
 usakin 'imikëx kamina uni
 ñukëbëtan pañukë chupa
 a pañuanan mitsux,
 ka nitëxëtia kixun unin
 istánun anun paëi 'ën
 'imikëx nikin mitsun bu
 tëai maxkúkanti 'ain,
 usai 'ika aín bakë bëchikë
 achúshira ñumiaxa uni masá
 nuituti inkë usai 'ikanti 'ikën,
 usai 'ika kamaxi aín sinan
 nishkëoi 'ikanti 'ikën.
- ¹¹ Èsai ka Dios kiaxa —anun
 usai ñu 'iti nëtë ka aia,
 usa 'ain ka 'ën bana a piti
 'aíma 'ain numin 'ikësa
 'imainun a xëati 'umpax
 'aíma 'ain shimakësa 'ën
 bana kuati ax 'iti 'ikën;
 usai 'ika 'ën bana kuati bari
 mekama oi uni niti 'ikën.

- ¹² Usa 'aish ka uni amami
 kikësa 'ixun,
 An Diosan bana ñuixunti uni
 bari,
 parúmpapa itsinuax bëtsi
 parúmpapanu kuani
 nianan aín tsipúmi-
 amiaxa bari urukë ami
 kikiyani kuantu 'ikën, 'aínbi
 ka usai nikinbi 'ën bana
 mërátima 'ikën.
- ¹³ 'Imainun ka xanu xuntaku
 upíirabu 'imainun uni
 bënëabu aín sinan kushibu
 akamax 'ën bana kuatima
 shimax 'ikësa bënëankanti
 'ikën.
- ¹⁴ Usai 'imainun ka numi 'ain
 'ikësa an Samaritanu 'ikë
 ñu tankin 'akë dios rabikë
 unikama 'ianan,
 an Danna 'ikë dios rabikë,
 'imainun Beersebanu 'ikë
 dioskama ax isa dios
 bamakëma a 'ikë kixun
 aín anë ñui bana akamax,
 únsaranbi nirutëkënu-
 xma pakëkë 'iti 'ikën.”

**Diosan unikama
 tëmëramikëbë ka úixbi
 iëtima 'ikë kikë bana**

9 ¹Usokin a ñukama istankëxun
 kana Dios. Anuxun ñuina
 xaroti rapasu nikë isan, iskëxun
 ka ësokin 'ë kaxa:

“Anuxun 'ë rabiti xubu
 akamina aín 'irakantikama
 manámi 'ikë a tinkati 'ain,
 usakin 'akëbë ka anu nankë
 ikama ax shaíkiti 'ikën;

¡shaíki ka ikama ax
 túukibuti ka unin
 maxkánu aín sanikama
 pakéti 'ikèn!
 Usokin 'akëbëa
 bamakëmakama atux
 abáti sinanx kuaniabi
 kana manë xëtökën 'akin
 rëtëti 'ain:
 usokin 'akëbë ka axa
 abáti sinanx abákë axbi
 achúshirabi iétima 'ikèn;
 2 'imainun kana me 'ukëmëu
 unéti
 sinanx unëtiabi anuabi
 chikínti 'ain;
 'anan kana naíkamë 'ëonu
 kuaruti
 sinanx kuarukë abi ubunun
 'imiti 'ain ënuax ka úxbi
 iétima 'ikèn.
 3 'Ianan kana aín bashi
 Carmelo kakë aín rëbu
 anu unéti sinánkëbi,
 'ënbi anua bari kuantí 'ain;
 'ianan kana 'ëmi unéti
 sinanx parúpapa
 'ukëmëu kuankë 'ikëbia,
 anu 'ikë ñuinakan 'ëo an
 masókin kënuanan 'atima
 oti xuti 'ain;
 4 'imainun kana axa ami
 nishkë unikaman
 ñatanbiankin buánkë
 'ikëbia,
 anuabi manë xëtökën 'akin
 rëtënun 'amíti 'ain.
 ¡Usa 'ain ka 'ën atu iskë
 ax upiókin 'akínti kupí
 iskëma 'ikèn!"
 5 Diosan ka ax kushiira 'ixun,

me axa tukibuti pankabunun
 'imia
 usai 'ikëbë ka kamabi
 unikama anu 'ikë ax inia.
 Usai 'ikëbë ka mex
 kuaruanan kuabutia, Nilo
 kakë baka ax 'ë tankëx
 kuabúkë usaribiti 'ia.
 6 Diosan ka naíkamë 'ëonu aín
 xubu 'akëxa
 'anan ka an me tuinti
 kamaribi menu 'akëxa;
 an ka parúpapa 'umpax
 timétankëxa me chabói
 'ibúnun 'imia.
 Ax ka Nukën 'Ibu Dios,
 kamabi kushiñu kakë a
 'ikèn.
 7 Èsai ka Dios kia:
 “¿Mitsun kaina upí
 unibuisamina 'ai kixun
 sinánkanin? Israel kama
 mitsux kamina, etíope
 unikamasaribi 'ain.
 'Ën kana Egipto menua
 mitsu bëakën,
 usaribi okin kana Creta
 menua filisteo unikama
 bëanan,
 Quir kakë anuaribi arameo
 unikamaribi bëakën usa
 'aínbi kamina mitsux
 atukamasama 'ain.”
 8 'Ën kana ënë ëmanu 'ikë
 unikama 'uchañu isan, usa
 'ain kana ësai kin:
 “'Ën kana ënë menua atu
 këñuti 'ain,
 usa 'aínbi kana Jacobnën
 rëbúnkikama kamaira
 këñutima 'ain.

- 'Ëx Dios 'aish kana, ësai kin.
 9 'Ën kana 'ën uni Israelkama
 bëtsi ëma kamanua bëkin
 anun tuanti 'akë anun
 ñu tuankëxa ñu bëru
 pakëkëma usaribi okin
 uinu 'ikë ax kara inutia
 isti 'ati 'ain
 'aínbi ka uinu 'ikë axbi
 inútima 'ikën.
 10 'Imainun ka kamabi uni
 'uchañukama ax 'ën
 unikamabë tsókëkama:
 ax ka manë xëtokën 'akëx
 bamati 'ikën.
 'Imainun ka axa usa ñuka
 nunu: inútima kianan,
 'aisama ñu kananuna
 nux 'inutima 'ai kikë
 akamaxribi bamati 'ikën.

**Diosan ka aín uni
 Israelkama birukin
 mëniókanun 'imitëkënti
 'ikë kikë bana**

¹¹A nëtë 'ikëbëtan kana 'ën
 David 'apu 'ain 'asaribiokin Israel
 unikama 'apuñu 'inun 'imiti 'ain.
 'Imikin kana kamabi ñukama anu
 'ikë akama 'atëkënun 'amiti 'ain,

¹²usa 'ain ka axa Edom menu
 bërua 'imainun bëtsi ëmakamanu
 bërua akamax amiribishi Israel
 menubi kuantëkënti 'ikën.” Usai
 ka Dios kiaxa usa 'ain ka aín bana
 kikësabi oi 'iti 'ikën.

¹³“'Ianan ka anun trigo bimi
 bikin këñúkë 'aímabi anu ñu
 'apáti me tukati nëtë 'iti 'ikën,
 'ianan ka anun uvas aín baka
 biti chakakin sënëonkë 'aímabi
 anun trigo 'apáti nëtëribi 'iti
 'ikën. Usai 'ikëbë ka aín bashi-
 kama 'imainun matákamanu
 'umpax chikutia iskësaira uvas
 baka 'iti 'ikën. ¹⁴Usai 'ikëbëtan
 kana ñatanbiankin ami nishkë
 unikaman aín menu buan Israel
 unikama bëtëkënti 'ain. Bëkëxun
 ka amiribishi anuax kaikin atun
 ëmakama birutëkënkë 'atankëx
 anu tsókin; uvakama 'apáti 'ikën
 'apáxun ka aín baka xëati 'ikën;
 'anan ka aín xubu rapasu ñu
 'apáxun bimia aín bimi piti 'ikën.
¹⁵Usokin 'imikëx aín menubi tsotia
 ka uínsaranbi amiribishi axa ami
 nishkë unikaman aín me 'ën 'inan
 anua buántëkëntima 'ikën.” Ësai
 ka Dios kiaxa.